



**Mahein Nia Lian no.6, 7 Junho 2010.**

## **Kilat Ilegal ho Grupu Ilegal iha Timor-Leste**

### **Lian Makloke**

Desde nakfera krize politika-militar iha 2006 no depois eleisaun geral iha 2007 nebe fo poder ba governu Aliansa Mayoria Parlamentar (AMP), kestaun grupu ilegal ho kilat no mos kilat nebe maka seidak konsege kolekta durante lansamentu operasaun konjunta entre Polisia Nasional Timor-Leste ho Falintil Forsa Defesa Timor Leste (PNTL-F-FDTL) sai hanesan prekupasaun bo'ot ba governu mos sociedade tomak to'o agora.

Hanesan fo sai tiha ona iha relatoriu Komisaun Inkeritu ONU nian iha loron 2 Outubru 2006. Iha dokumentu ne'e Komisaun Inkeritu deskobre katak laos deit husi PNTL deit maka fahe kilat ba populasaun sira maibe F-FDTL mos distribui kilat ba sivil sira liu-liu sira nebe maka konsideira nudar veteranus resistensia nian. Maibe to'o ikus F-FDTL liu husi sira nia Komando Geral konsege halibur hamutuk hotu kilat hirak nebe maka sira fahe ba veteranu no sivil sira.<sup>1</sup> E bazea ba dadus nebe iha kilat PNTL nian hamutuk 16 nebe maka to'o agora sei namkari hela iha rai laran.<sup>2</sup>

To'o agora mos ita seidak hatene resultadu husi kilat hirak ne'e, tamba seidak iha relatoriu formal husi orgaun kompetete hanesan Sekretariu Estadu de Seguransa no PNTL. Tamba eventus seluk mos mosu barak tebes depois de krize 2006, halo ema barak sai haluha ou la debates ona kona ba asuntu ida ne'e. Mesmu ema hotu hatene katak, kuandu kestaun relasiona ho kilat ilegal, ne'e sempre sai hanesan ameasa bo'ot ba ema hotu nia vida moris.

PNTL nudar institusaun nebe foun hasoru problema barak desde nia estabelesementu. Komesa husi treinamentu ba nia membrus sira nebe maka la suficiente atu bele garantia katak PNTL bele sai profesional. Iha parte seluk, tamba Timor-Leste tama kategoria nudar nasaun postu-konfliktu entaun iha membru barak maka iha afiliasaun politika makaas ho parte balun. Realidade ida ne'e ita bele hare iha 2006 wainhira Ministru Interior, Rogerio Lobato tenta atu utiliza PNTL sai nudar forsa uniku ba Partidu Frente Revolucionária do Timor-Leste Independente (FRETILIN) no kontribui mos ba krize politika-militar iha rai laran.<sup>3</sup>

Depois de krize-politika militar, PNTL tenta para atu hadia nia imajem liu husi Operasaun Konjunta ho F-FDTL kontra grupu Gastaun Salsinha. Lideransa mos troka husi Paulo Fatima Martins ba Afonso de Jesus e ikus liu maka Longinhos Monteiro ho mandatu atu re-organiza fila fali PNTL nia estrutura tomak.

---

<sup>1</sup> Hare relatoriu Komisiaun Inkeritu Independente ONU nian, Pagina 56-57.

<sup>2</sup> STL, 13 de Janeiro 2010, *UNPOL –PNTL Identifika Kilat Ilegal Iha Timor-Leste*.

<sup>3</sup> Hare Hamish Mcdonald, *The Minister Equipped Police as Private Army*, Sidney Morning Herald, June-19-2006.

Iha Longuinhos Monteiro nia tempu maka komesa mosu eventus oin-oin, komesa husi Ninja iha Bobonaro no Suai to'o fali grupu armadu ilegal iha Ermera antes de selebrasaun 20 de Maiu.

Iha Mahein Nia Lian ba 6 ne'e, Fundasaun Mahein deside atu hato'o ba sani nain sira kona ba eventu nebe maka foin dadauk akontese iha suku Fatubolo, disitritu Ermera. Tamba ba populasaun iha Dili, saida maka mosu iha Ermera hanesan insidente bain-bain ida nebe la precisa fo importansia.

Iha dia 16 kalan, mosu rumores katak kilat tarutu iha suku Fatubolo, distritu Ermera. Komesa dia 20 de Maiu, ema barak maka sei koalia kona ba buatus ne'e, mesmu iha selebrasaun ba 20 de Maiu halao nafatin hanesan bain-bain, inklui mos iha Distritu Ermera.

Buatus ida ne'e mos konsege atu justifika lia anin nebe namkari iha populasaun Timor-Leste nia let iha fulan hirak liu ba katak sei mosu amease bo'ot iha dia 20 de Maiu 2010 wainhira povu Timor-Leste selebra sira nia restaurasaun independensia.

Kestaun bo'ot ida mosu, tamba saida maka kuandu povu Timor-Leste atu selebra sira nia loron importante sempre mosu buatus ou lia anin katak iha elementus ou komponentes balun maka iha intensaun atu estraga ou halo disturbu iha eventus hirak ne'e?

Bazea ba informasaun ne'e be despalha iha media lokal esplika katak iha dia 16 kalan ema nain sanulu resin tolu ho kilat 12 halo asaltu ba Companhia de Operacões Especiais (COE) iha suku Fatubolo, distritu Ermera. Noticias ne'e salienta tan katak tiru malun ne'e akontese kuaze oras 2 ka 3 nia laran.<sup>4</sup>

Mas kestaun ida maka, se grupu rebelde ou bandidus armadu ida bele agoenta tiru malun ho forsa estadu nian iha oras 2 ka 3 nia laran, ne'e hatudu katak grupu ne'e armado ho sofisticadu no modernu tebes, tamba konsege komfronta forsa estadu nian.

Informasaun ne'ebe maka kolekta husi populasaun iha Ermera salienta katak la akontese tiru malun iha suku Fatubolo maibe kilat lian dala ida deit e situasaun iha Ermera kalma nafatin e populasaun mos halao sira nia actividades hanesan bain-bain e sira mos sei konsege selebra loron restaurasaun independensia iha 20 Maiu 2010. Iha loron ne'e kedas, eventu konaba noticia ne'e mos mate e ema ladun koalia ona sobre saida maka akontese iha Ermera.<sup>5</sup>

Iha artigu badak ida ne'e Fundasaun Mahein hakarak fo hanoin ba sani nain sira katak molok mosu buatus iha Ermera, mosu ona isu Ninja iha distritu Suai no Bobonaro. Ema katuas sira dehan laiha udan, laiha anin Ninja hirak ne'e mosu derepente deit.

Prezidente Parlamentu Nasional, Fernando La-Sama de Araujo halo vizita ba fatin nebe refere depois de Komandante Geral PNTL Longuinhos Monteiro no nia elementus sira kontrola tiha ona situasaun iha fatin hirak ne'e. Iha ninia intervensaun, Prezidente Parlamentu hatudu ba publiku kartaun husi membrus hirak ne'ebe hanaran a'an 'Grupus Bua-Malus no CPD-RDTL.' Hakfodak tebes tamba kartaun hirak ne'e dezenhu ho modernu, iha kartaun ki'ik oan ida nia laran ita bele hare bandeira husi partidu tolu,

---

<sup>4</sup> Hare Timor Post 19-05-2010

<sup>5</sup> Dadalia ho Casilda Fernandes, populasaun Gleno, distritu Ermera 20-05-2010.

ASDT, FRETILIN no PPT. Ema barak maka hakfodak, oinsa grupu Bua Malus no CPD-RDTL sira nebe maka sira nai membrus mayoria hela iha distritu no area remota bele produs kartaun ho modelu hanesan, karik estudante ne'ebe atende kursu komputador mos nia kapasidade seidak to'o iha ne'eba.

Tamba deit ita hakarak kombate grupu ki'ik ida iha rai laran, governu presiza mobiliza forsa ida ke bo'ot kompostu husi PNTL no F-FDTL maibe realidade hatutu katak iha ameasa seriu husi rai liur. Iha faze ida ne'e ita bele hare katak, Forsa Armada no instituisaun PNTL estabelese laos atu proteje no defende nia cidadaun husi ameasa externa maibe sai fali oppressor ba nia populasaun rasik. Sa tan realidade nebe mos katak Ninja laos kauza ida ke bo'ot para sai ameasa ba estabilidade nasional.

Eventus ikus maka akontesimentu iha suku Fatubolo, distritu Ermera. Dala ida tan Ermera—mesmu informasaun ne'ebe maka kolekta sei minimu tebes atu halo konklusaun katak akontese duni acidente iha neba—sai nudar kampu de batalha. Iha 2006 mosu grupu Petisaun no sira halo sira nia akampamentu iha Suku Fatubessi iha Ermera, to'o ikus sira rende ba estadu.

Kazu Ninja iha Suai no Bobonaro no mos eventu nebe maka akontese iha dia 16 kalan iha Ermara karik hanesan pretextu ida deit para atu desvia povu nia terus depois de ukun rasik a'an. Hare husi esperensia wainhira membru PNTL halo 'Operasaun espesial' ba Ninja iha Bobonaro no Suai, iha tendensia politika barak mos involve iha operasaun ne'e.

Operasaun kombate Ninja ne'e nudar meios ida atu ha'tauk membrus ka simpatizantes partidu politiku balun, no obriga comunidade hodi afilia sira nia a'an ba partidu ruma hodi bele kompete ba eleisaun municipiu.<sup>6</sup>

### **Problema Sistema Informasaun ba Publiku iha Institusaun PNTL**

Komandante Geral PNTL Longuinhos Monteiro konfirma katak iha kilat ilegal barak seidak mak kolekta iha populasuan nia let. Longuinhos Monteiro mos esplika tan katak grupu ilegal uza material funu nian ne'be mai husi kilat ne'ebe forsa Indonezia uza antes 1999.<sup>7</sup>

Longuinhos Monteiro mos fo pressaun tan katak "ema eis militar 745 ida, reforma tiha ona, e sira mak agora lidera grupu armadu ida iha Ermera, sira iha kilat, maibe to'o agora dadaun PNTL sei halo aprosimasaun ba sira."<sup>8</sup> Maibe, iha ninian esplikasaun Longuinhos Monteiro la mensiona sobre membros nain hira maka kompostu husi grupu ilegais ne'e.

Bazea ba informasaun nebe publika husi media lokal afirma katak tiru malu entre grupu ilegais no membru PNTL akontese kuaze oras 2 ka 3 nia laran. Karik tiru malun entre grupu ilegal no polisia espesial ne'e maka akontese kuaze oras 2 ka 3 nia laran, entaun teoritikamente precisa forsa ida ke bo'ot no kilat kompletu husi parte grupu ilegal sira. Se

---

<sup>6</sup> Relatoriu Asosiasaun HAK kona ba situasaun Suai no Bobonaro, 15-Febrero-2010.

<sup>7</sup> Hare CIJTL, 20,05, 2010, *Longuinhos; Eis Militar 745 Ida Agora Lidera Grupus Armadu Iha Ermera*

<sup>8</sup> CIJTL, 20,05, 2010, *Longuinhos; Eis Militar 745 Ida Agora Lidera Grupus Armadu Iha Ermera*. Maibe Longuinhos le temi ho klaro eis membru 745 ne'e nia naran no mai husi nebe.

lae, oinsa sira bele sustenta no enfrenta ho forsa estadu nian. Teoritikamente ne'e la logiku.<sup>9</sup>

Iha parte seluk, Segundu komandante PNTL, Afonso de Jesus fo presau katak desde Komandante Geral PNTL Longuinhos Monteiro sai ba Portugal, situasaun seguransa iha rai laran normal. Iha komponentes balun maka tenta despalha rumores sobre ema sunu uma iha Ermera, povu oho malun no rumores seluk tan. Maibe tuir Segundu komandante PNTL katak, acidente hirak ne'e la akontese no geralmente situasaun normal.<sup>10</sup>

Mosu konfusaun bo'ot tamba iha parte seluk esplikasaun husi segundu komandante iha leten kontradiz ho saida maka Komandante Geral Longuinhos Monteiro hato'o. Longuinhos Monteiro iha konferensia da imprensa iha Dilli iha dia 20 de Maio haklaken katak grupu ilegal nebe refere sunu populasaun nia uma no grupu ne'e mos tiru malun ho Companhia de Operações Especiais (COE) suku Fautubolo, Distritu Ermera.

Wainhira konfirma dadus nebe maka Komandante Geral PNTL koalia ho Segundu Komandante 'nia aseita katak buat nebe maka komandante geral koalia konsideira katak los.' Maibe segundu Komandante Afonso de Jesus hato'o katak to'o agora PNTL iha distritu Ermera sei iha tereinu para hodi halo investigasaun no kolekta dadus konkretu kona ba grupu ilegal ida ne'e.<sup>11</sup>

To'o agora PNTL mos seidak konsege identifika tipu kilat saida maka 'grupu ilegais' uza hodi ataka PNTL. Afonso de Jesus hateten katak PNTL sei kolabora ho comunidade tomak para hodi bele kolekta kilat hirak ne'e.

Sobre kilat hira maka grupu ilegal ne kaer, realidade hatudu katak entre PNTL no media iha informasaun ida ke la kondiz ba malun (Timor Post 19-05-2010). Iha nia publikasaun hateten katak grupu ilegal hamutuk ema nain 13 ho kilat lonon 11. Maibe Segundu Komandante PNTL, Afonso de Jesus insista katak bazea ba informasaun nebe iha grupu ilegal nia membru hamutuk nain 10 deit e sira lori kilat 9<sup>12</sup>

Afonso de Jesus mos esplika katak dala ruma maka comunidade tauk atu hateten sai kilat saida deit maka grupu ilegal ne'e iha tamba PNTL rasik sidauk hatene lolos konaba grupu ilegal.<sup>13</sup>

Sei mosu debates iha sosiedade nia let sobre grupu ne'e nia abut. Informasaun nebe mosu mos kahur malun. Maibe Segundu Komandante PNTL hateten grupu ilegal ne'e sira nebe maka konsege halai sai ou salva a'an wainhira akontese operasaun Ninja iha Bobonaro no Suai no agora dadaun organiza a'an fila fali iha Distritu Ermera.<sup>14</sup>

Iha parte seluk, Komandante PNTL distritu Ermera, Marioano Martins deklara katak la iha kilat ida maka tarutu iha suku Fatubolo no mos la iha grupu ilegal ida iha area nebe refere.<sup>15</sup> Argumentu ida ne'e kuaze halai ses ho saida maka hato'o tiha ona husi

---

<sup>9</sup> Komandante PNTL distritu Dili, Pedro Belo, 25-05-2010.

<sup>10</sup> Segundu Komandante PNTL, Afonso de Jesus, Dili, 26-05-2010.

<sup>11</sup> Afonso de Jesus Quarter Geral PNTL, Kaikoli, Dili, 26-05-2010.

<sup>12</sup> Afonso de Jesus, Quarter Geral PNTL, Kaikoli, Dili 26-05-2010.

<sup>13</sup> Afonso de Jesus, Quarter Geral PNTL, Kaikoli, Dili 26-05-2010.

<sup>14</sup> Afonso de Jesus, Quarter Geral PNTL, Kaikoli, Dili 26-05-2010.

<sup>15</sup> Timor Post, 28-05-2010. Timor Post, 28-05-2010.

Komandante Geral ho Segundu Komandante PNTL. Iha parte ida ne'e ita bele dehan laiha linha koordenasaunida ke klaru hosi Quartel Geral PNTL iha Dili no PNTL iha distritu.

Alarmismu nebe maka hato'o husi Komandante Geral Longuinhos Monteiro la diferente ho invensaun kazu Ninja nebe akontese iha distritu Bobonaro no Suai. Operasaun ne'e hetan kritika maka'as tamba PNTL sira komete violensia direitus humanus no gasta osan estadu ho montante ida bo'ot tebes maibe nia resultadu laiha.<sup>16</sup>

### **'Grupu Ilegal', Militerizasaun no Politika iha Rai Laran**

Hare fali historia iha pasadu hatudu katak Kestaun kilat ilegal no grupu ilegal laos foin maka mosu agora. Iha 1975 depois de nakfrera revolusaun *dos cravus* iha Portugal, *milicias* timor oan sira hadau kilat husi soldadu Portuguese iha Fayol, Taibessi. E kilat sira ne'e sirkula entre milicias UDT no FRETILIN. Depois mosu funu civil iha 11 de Agustu 1975.<sup>17</sup>

Depois de FRETILIN halo kontra golpe no kontrola kuaze teritoria tomak iha Timor-Leste, UDT retira ba fronteira Indonezia nian. Iha fronteira Indonezia nia, UDT ho APODETE simu armamentu husi militar Indonezia. Militar Indonezia fo treinamentu militar basiku ba sira no to'o ikus sira fo assistensia fo Indonezia hodi halo invasaun mai Timor-Leste.<sup>18</sup>

Depois FRETILIN retira ba foho no ai laran, funu ho militar Indonezia kontinua nafatin e FALINTIL sira mos konsege hadau kilat barak husi militar Indonezia sira. Depois de independensia, laiha ema ida maka bele garantia katak kilat hirak nebe maka FALINTIL sira kaer durante iha ai laran konsege kolekta ou entrega hotu ona ba instituisaun kompetente.

Laos ona buat ida ke segredu katak 'diskursu' kona ba grupu ilegal iha rai laran mos iha relasaun forte ho politika iha rai laran. Grupu ilegal ne'e mosu wainhira besik ba elesaiun. kuandu hare fali akontesementu hirak ba kotuk, grupu Petisaun no grupu Major Alfredo Reinaldo mosu iha 2006 wainhira elesaun sei falta tan tinan rua (2008), nune'e mos kazu Ninja nebe mosu iha Bobonaro no Suai— bazeia ba relatoriu Asosiasaun HAK—iha relasaun maka'as ho Eleisaun Kamara Municipiu.<sup>19</sup>

Iha 1999 molok referendum, militar Indonezia forma grupus milicias nebe kompletu ho kilat kuaze iha teritoriu tomak. Laiha ema ida maka bele garantia katak kilat sira ne'e agora para iha Indonezia ou balun sei subar hela iha Timor-Leste.

Rumores kona ba grupu ilegal mos iha ligasaun forte ho militarizasaun PNTL no iha tendensia kompetisaun entre PNTL-F-FDTL. Tendensia ida ne'e ita bele hare desde iha tinan 2005 wainhira Ministeriu Interior Rogerio Lobato proposta orsamentu ba governu Primeiru Ministru Mari Alkatiri atu sosa kartus musan. Hakfodak los Jurnal STL publika

---

<sup>16</sup> Hare Komunikado Imprensa Bankada Opojisaun FRETILIN iha Parlamentu Nasional, 28 de Maiu 2010.

<sup>17</sup> John G. Taylor, *The Price of Freedom*, Zed Books, 2000.

<sup>18</sup> Irena Cristalis, *East Timor: A Nation's Bitter Dawn*, Zed Books, 2009.

<sup>19</sup> Hare Relatoriu Asosiasaun HAK sobre situasaun iha Bobonaro no Suai. 15 Februari-2010. To'o ikus Prezidente no Parlamentu Nasional deside katak Eleisaun ba Kamara Municipiu cansela e sei halao fali iha 2014.

sai katak montante orsamentu ba PNTL atu sosa kartus musan iha tempu ne'eba hamutuk US\$ 10,184,000 milloens.<sup>20</sup>

Dezenvolvimentu ba PNTL nia kilat ne'e harahun relasaun institusaun PNTL ho F-FDTL. Pur-ezemplu wainhira PNTL deside atu kria Unidade de Patrulhamentu de Fronteiras (UPF). Komponentes F-FDTL balun ladun kontente ho kriaun ida ne'e tambah hare katak sira nia dever la diferente ho F-FDTL nebe maka iha mandatu atu defende nasaun husi ameasa externa nian.<sup>21</sup>

Depois de Longuinhos Monteiro kaer kargu nudar Komandante Geral PNTL, tendensia atu militariza PNTL ne'e kontinua nafatin. Longuinhos Monteiro konsege estabese tan Batalhaun Ordem Publika (BOP) ho boina mean nebe kontinua halo traina malitar nia durante loron 3 iha Rairobu, distritu Bobonaro iha loron 14-16 Dezembru 2009.

Komandante Geral Longuinhos Monteiro halo tentativa hodi aumenta tan kilat ba iha PNTL nia armajem ho kilat semi-automatiku no mos automatiku depois de nia hetan kargu nudar Komandante Geral PNTL<sup>22</sup>

Longuinhos Monteiro nia aktus sira ne'e hetan kritika maka'as mos husi ulun bo'ot partidu opojisaun nian. Fernanda Borges, Prezidente Partidu Unidade Nasional (PUN) lamenta katak, Longuinhos Monteiro ema nebe konhesidu gosta kaer kilat bo'ot, hetan eleitu husi Primeiru Ministru Xanana Gusmao bazea ba nia imagem nudar "ema forte" nudar parte husi "jogu ida ke perigu atu halo balansiu hosi PNTL ne'e be fraku ho F-FDTL ne'e be maka'as."<sup>23</sup>

Longuinhos Monteiro nia decisau hodi lidera rasik operasaun kontra Ninja iha Suai no Bobonaro hodi utiliza kilat bo'ot mos hamosu deskontente iha F-FDTL nia laran tamba laos kompetensia PNTL nian para atu enfrenta amesa husi liur.<sup>24</sup> Iha imagem ida katak Longuinhos atu kria fali 'forsa minimu' ida iha forsa ida nia laran o hanesan fontes Mahein hato'o katak Komandante Geral PNTL nia tenta atu kria lagua ida iha tasi bo'ot ida nia laran."<sup>25</sup>

Mesmu Primeiru Ministru Xanana Gusmao tenta atu kria balansiu entre PNTL-F-FDTL hodi monta Longuinhos Monteiro nudar Komandante Geral PNTL, maibe Primeiru Ministru nebe mos nudar Ministru da Defesa ho Siguransa laos halo tuir deit buat ne'e be maka Longuinhos Monteiro proposta ba nia. Maibe Longuinhos Monteiro nunka kole hodi esforsa nafatin. Kazu Ninja iha Bobonaro no Suai, grupu ilegal iha Ermera nudar tentativa ida para bele justifika nia proposta atu aloka tan orsamentu ba armamentu ida ke bo'ot e modernu ba PNTL.

Jose Teixeira, membru Parlamentu Nasional (PN) husi Komisaun B nebe trata asuntu Defesa no seguransa hateten katak karik eventu iha Ermera ne'e atu kria pretextu ida ba Komandante Geral Polisia PNTL atu bele hola kilat bo'ot hodi mantein seguransa iha rai laran. Tamba idea ida ne'e Longuinhos Monteiro hato'o antes tiha ona ba Konsehu

---

<sup>20</sup> Hare STL 16-Julho, 2005, *Orsamentu Foun atu Hola Kilat Musan*.

<sup>21</sup> Hasegawa, *Issue Paper: Weapons proliferation in Timor-Leste*, 26-10-2004.

<sup>22</sup> Hare, *Security Sector Reform Monitor*, Timor-Leste, No. 2, May 2010.

<sup>23</sup> *Security Sector Reform Monitor*, Timor-Leste, No. 2, May 2010.

<sup>24</sup> *Security Sector Reform Monitor*, Timor-Leste, No. 2, May 2010.

<sup>25</sup> Entrevista ho fontes Fundasaun Mahein nian, 25-05-2010.

Ministru mas hetan resistensia maka'as no kansela tiha husi Primeiru Ministru no Ministru da Defesa e Siguransa.<sup>26</sup>

Atu liga ba politika iha rai laran, Francisco Branco, membru PN husi bankada FRETILIN fo hanoin katak tamba agora dadaun Primeiru Ministru halao prosesu konsultasaun iha distritu tomak. E nia mos sei halo vizita ba Ermera, geralmente populasaun Ermera barak maka la kontente ho prosesu politiku no dezemvolvimentu nebe halao durante Primeiru Ministru Xanana kaer ukun. Tamba ne'e iha jogada hodi kria 'disturba ba seguransa iha neba' para bela minimiza populasaun nia kritika.<sup>27</sup>

### **Fontes Seluk Kona ba Akontesimentu iha Ermera**

Isu konaba grupu ilegal iha distritu Ermera ho informasaun nebe komandante Geral PNTL lahanesan ho realidade nebe akontense.<sup>28</sup> Ironiku liu maka informasaun nebe fo sai entre Komandante Geral PNTL no Segundu Komandante Afonso de Jesus ho Komadante PNTL distritu Ermera Mariano Martins hatudu katak laiha koordinasaun nebe diak entre lideransa nain 3 ne'e. Tuir lolos wainhira komandante ida atu hasai lia fuan ida ba publiku, nia temke halo investigasaun ho kleaan.<sup>29</sup>

Fontes ne'e mos esplika tan katak iha kilat espalha duni iha Ermera. Mas kilat ne'e laos iha Ermera deit maibe iha mos fatin balun iha Timor-Leste. Fontes ne'e dehan iha krize 2006 governu tenta para atu kolekta kilat sira ne'e hotu. Maibe balun deit maka konsege kolekta e balun seidauk, e kilat sira ne'e barak liu maka PNTL nian. Fulan Agustu 2009 Governu Timor-Leste liu hosi Komandu Kunjunta halo kampanha ba halibur meik ho kroat<sup>30</sup> ilegal maibe kazu Ermera hatudu nafatin katak kilat ilagal sidauk kolekta hotu. Uma to'os 4 hetan sunu hosi grupu ilegal no mos tiru kilat dala 1 iha dia 16 Maiu 2010 Iha Ermera.<sup>31</sup> Maibe sira la konsege identifika grupu ne'e mai husi nebe e lori kilat ka lae.<sup>32</sup>

Eis membru batallaun 745 se karik iha, ne'e tama iha kategoria grupu ilegal e ida ne'e laiha relasaun ho governu Indonezia. Tenke tau buat ne'e iha kontektu purke grupu ilegal nebe tama sai ilegal mai Timor-Leste halo buat ruma iha ne'e. Laiha relasaun o decisau politika ruma husi governu Indonezia. Purke durante ne'e gruvernu Indonezia ho Timor Lesta iha relasaun diak tebes-tebes liu-liu iha parte seguransa nian iha fronteira (Fontes Fundasaun Mahein 27-05-2010). Maibe iha distritu Oecusse siguransa fronteira sei kontinua nafatin problma.

Kona ba informasaun ne'e be la han malu entre Komandante PNTL sira, iha parte seluk Prezidente Komisaun B ne'e be trata asuntu Defesa no Siguransa, Duarte Nunes<sup>33</sup> insista katak uluk kedas ema sempre koalio dehan iha kilat, maibe kestaun bo'ot ida maka, se los maka kaer kilat hirak ne'e?<sup>34</sup>

---

<sup>26</sup> Jose Texeira, Parleменту Nasional Komisaun B, 26-05-2010.

<sup>27</sup> Francisco Branco, Dili. 26-05-2010.

<sup>28</sup> Entrevista ho fontes Fundasaun Mahein nian, Dili, 27-05-2010.

<sup>29</sup> Entrevista ho fontes Fundasaun Mahein nian, Dili, 27-05-2010.

<sup>30</sup> Kilat

<sup>31</sup> Fontes Fundasaun Mahein, Dili, 27-05-2010

<sup>32</sup> Entrevista ho fontes Fundasaun Mahein nian, Dili, 27-05-2010.

<sup>33</sup> Cefi Komisaun B Palementu Nasional

<sup>34</sup> Duarte Nunes, Dili, 4, 06, 2010.

Duarte Nunes membru Parlamentu Nasional Prezidente Komisaun B mos lamenta tebes ho deklarasaun husi Komandante Geral PNTL, Longuinhos Monteiro. Duarte Nunes deklarata katak PNTL la profesional fo sai informasaun konaba grupu ilegal iha distritu Ermera, ikus mai rezulta povu paniku.<sup>35</sup>

Wainhira konfirma tan kona ba deklarasaun husi Segundu Komandante PNTL, Afonso de Jesus ne'e be dehan grupu ilegal ne'e agora dadaun organiza a'an iha suku Fatubolo, distritu Ermera. Duarte Nunes rezeita hodi dehan katak grupu ne'e la iha. Nia mos hamosu tan kestaun oinsa maka grupu ne'e bele organiza a'an? Se maka organiza e nia lider sira maka se? Iha dadus iha ne'ebe? Tamba laiha dadus konkretu entaun buat isue hirak ne'e lao ba nafatin.<sup>36</sup>

Iha dia 26 de Maiu, Duarte Nunes telefone ba Komandante Operasional PNTL, Mateus Fernandes. Mateus Fernandes hato'o katak wainhira nia koalia ho populasaun iha area refere, populasaun sira dehan la iha buat ida maka akontese iha sira nia area, laiha kilat ida lian no laiha uma ida sunu.<sup>37</sup>

Longuinhos Monteiro tenta kria pretextu hirak ne'e para iha razaun ba nia hodi sosa kilat bo'ot atu reforsa tan PNTL, Duarte husu Timor-Leste hola tan kilat atu funu ho se, atu funu ho Indonesia?, ne'e imposivel!. Nia mos esplika katak so Parlamentu Nasional deit maka bele deside orsamentu hira maka atu gasta inklui mos ba instituisaun PNTL.

### **Aspeitu Ekonomiku no Estabilidade Nasional**

Eventu nebe maka akontese iha suku Fatubolo, distritu Ermera ne'e mos iha impaktu bo'ot ba aspekto ekonomia lokal tamba agrkultor sira sente ameadu wainhira sira atu tau matan ba sira nai aihoris, kafe no produtu agrikultura seluk tan. Laos deit impaktu ba ekonomia lokal maibe mos tamba eventu iha Fatubolo iha relasaun ho estabilidade iha nasional entaun dala ruma investor sira iha liur mos sei dada a'an para atu mai investe iha rai laran.<sup>38</sup>

Aspeitu sosial no ekonomiku mos fo influensia ba grupu ilegal nebe mosu iha Ermera. Ekonomikamente mesmu Ermera nudar distritu nebe nia produtu maka'as iha area kafe maibe nia infrastruktura baziku la favorese nafatin to'o agora. Pur-ezemplu hanesan dalan nebe a'at araska ba agrikultores sira atu transporte sira nia produtu agrikultura mai Dili. Iha mos kompanha nebe esiste iha Ermera hanesan Timor Global no NCBA. Maibe hanesan ita hotu hatene katak kompanha hirak ne'e kompete atu akumulata kapital ba sira a'an rasik du ke hanoin agrikultur sira nia diak.

Problema seluk tan numeru ema ne'e be maka lahatene le'e no hakerek a'as tebes. Realidade hirak ne'e aumenta tan ho asesu ba informasaun nebe menus no populasaun iha area remota laiha informasaun ida ke adekuaudu sobre prosesu dezvoltamento no progressu iha rai laran.

---

<sup>35</sup> Duarte Nunes, Dili, 4, 06, 2010.

<sup>36</sup> Duarte Nunes, Dili, 4, 06, 2010.

<sup>37</sup> Duarte Nunes, Dili, 4, 06, 2010.

<sup>38</sup> Arsenio Bano hateten eventus hirak nebe maka akontese ladun favorese kresimentu ekonomia iha rai laran no atrai investidores sira inklui mos questuun dada pipeline mai Timor-Leste. Entrevista ho Arsenio Bano, membru Parlamentu Nasional husi Bankada FRETILIN no membru Komisaun B nebe trata asuntu Defesa no Seguransa. Dili, 26, 05, 2010.



## Konklusaun

Historia hatudu katak nasaun post-konflitu barak maka enfrenta problema instabilidade iha rai laran depois de hetan sira nia independensia.

Iha Nicaragua, Norte Amerikanu, depois de Sandinista hadau poder iha tinan 1979. Mosu kedas grupu milisia ida ho naran CONTRA, nebe maka estabelese sira nia base iha fronteira entre Nicaragua no Honduras no kria instabilidade iha Nicaragua to'o hamonu governu nebe maka lidera husi Prezidente Daniel Ortega.<sup>39</sup>

Maibe esperensia hanesan mensiona iha leten kuandu liga ba situasaun iha Timor-Leste. Bele dehan katak seidak iha parte ida maka kria milisia iha fronteira entre Indonezia no Timor-Leste e relasaun entre nasaun rua ne'e mos lao kapas tebes. Tendensia nebe mosu iha Timor-Leste maka iha 'entidades balun' kria pretextu ba sira nia interese politika hodi kria instabilidade iha rai laran. Nudar nasaun foun, espera katak Timor-Leste sei la repete historia negru husi nasaun postu-konflitu sira nebe maka temi ona iha leten.

Rekomendasaun Fundasaun Mahein (FM) 1:

FM rekomenda ba orgaun kompetente hanesan Ministeriu Defeza e Seguransa halo audit ou revista ba armajem PNTL no F-FDTL nian. E deklar ba publiku liu hosi Parlamentu Nasional Komisaun B konaba kilat hira maka iha armajem no hira maka sei lakon.

Rekomendasaun FM 2:

FM rekomenda katak iha futuru tenke fo treinamentu ba PNTL liu-liu foka ba area Direitus Humanus, oinsa trata suspeitu sira no mos oinsa atu atende kazu iha comunidade nia let.

Rekomendasaun FM 3:

FM rekomenda katak preciza kria sistema informasaun ida ke integradu atu halo koordinasaun ida ke diak entre membrus PNTL iha distritu tomak, Quartel Geral PNTL iha Dili no Servisu Nasional da Inteligencia (SNI). Koordinasaun mos importante para PNTL atu hasai apelu ruma ba publiku tenke bazea ba dadus konkreta iha tereinu no realidade nebe akontese para atu la bele kria paniku iha povu nia let.

Rekomendasaun FM 4:

FM mos rekomenda katak iha futuru governu tenke fo atensaun makas ba PNTL ba Unidade Polisia Komunitaria atu bele halo sira nia dever no hakbesik liu tan ba comunidade atu bele atende sira nia kazu hodi prevene violencia.

Rekomendasaun FM 5:

FM mos rekomenda ba governu atu bele trata forsa rua PNTL ho F-FDTL hanesan no evita kompetisaun ba forsa rua ne'e.

---

<sup>39</sup> Michael T. Klare & Peter Kornbluh (Ed), *Low Intensity Warfare: Counterinsurgency, Proinsurgency, and Antiterrorism in the Eighties*, Pantheon Books, New York 1988, p 132.

Rekomendasaun FM 6:

FM mos rekomenda katak iha operasaun saida deit PNTL tenki respeita propriedade comunidade nian, komesa husi ai horis to'o animal<sup>40</sup> nebe maka comunidade sira hakiak.<sup>41</sup>

**Lia Nain:**

Dadalia ho Casilda Fernandes, populasaun Ermera, (20-05-2010).  
Entrevista Longinhos Monteiro no Centro Jornalismo Investigativo, (19-05-2010.)  
Kontakto via telefone ho komandante Pedro Belo, (25-05-2010).  
Entrevista ho Segundu Komandante PNTL, Afonso de Jesus, (26-05-2010).  
Hare entrevista Centro Jornalismo Investigativo, (19-05-2005).  
Entrevista ho Afonso de Jesus, (Dili 26-05—2010).  
Entrevista ho Fontes Mahein nian ne'ebe lakohi temi sai sira nia identidade pesoal, (25-05-2010).  
Entrevista ho Duarte Nunes, Dili, 4, 06, 2010.  
Dada lia ho Jose Texeira, (26-05-2010).  
Dadalia ho Francisco Branco, (26-05-2010).  
Entrevista ho fontes Fundasaun Mahein nian, (Dili, 27-05-2010).  
Entrevista ho fontes Fundasaun Mahein nian, 25-05-2010.

**Fontes Seluk:**

Relatoriu Komisiaun Inkerito Independente ONU nian, Pagina 56-57.  
STL, 13 de Janeiro 2010, *UNPOL –PNTL Identifika Kilat Ilegal Iha Timor-Leste*.  
Hamish Mcdonald, *The Minister Equipped Police as Private Army*, Sidney Morning Herald, June-19-2006.  
elatoriu Asosiasaun HAK kona ba situasaun Suai no Bobonaro, 15-Fevereiro-2010.  
CIJTL, 20,05, 2010, *Longinhos; Eis Militar 745 Ida Agora Lidera Grupu Armadu Iha Ermera*  
Timor Post 19-05-2010  
STL 16-Julho, 2005, *Orsamento Foun atu Hola Kilat Musan*.  
Hasegawa, *Issue Paper: Weapons proliferation in Timor-Leste*, 26-10-2004.  
Security Sector Reform Monitor, Timor-Leste, No. 2, May 2010.  
STL, Tersa 01, Junhu, 2010, *Durante Operasaun Espesial, Polisia Tiru Naok Karau*.  
Michael T. Klare & Peter Kornbluh (Ed), *Low Intensity Warfare: Counterinsurgency, Proinsurgency, and Antiterrorism in the Eighties*, Pantheon Books, New York 1988, p 132.  
Joseph Hanlon, Mozambique : *Who Calls the Shots?* Indiana University Press, 1991.  
John G. Taylor, *The Price of Freedom*, Zed Books, 2000.  
Irena Cristalis, *East Timor: A Nation's Bitter Dawn*, Zed Books, 2009.  
Komunikadu ba Imprensa: *Fretilin Husu Komandante Geral PNTL Atu Labele Halo Povu Ermera Tauk Tan* (28-Maiu-2010).  
Timor Post, 28-05-2010. Timor Post, 28-05-2010.

---

<sup>40</sup> STL, Tersa 01, Junhu, 2010, *Durante Operasaun Espesial, Polisia Tiru Naok Karau*.

<sup>41</sup> Tamba bazea ba reportajam husi jurnal fo sai katak membru PNTL tiru mate populasaun nia karau hamutuk 28 durante Operasaun Espesial iha Bobonaro